

四庫全書

子部

欽定四庫全書

子部
法苑珠林卷三
四

詳校官中書臣沈鳳輝

檢討臣何思鈞覆勘

總校官檢討臣何思鈞

校對官中書臣葉蘭

謄錄監生臣劉遼

欽定四庫全書

法苑珠林卷三

唐 釋道世 撰

劫量篇第一之一

小三災部

述意

夫劫者蓋是紀時之名猶年號耳然則時無別體約法而明所以聖教弘宣多所攸載者雖非理觀之沖規亦

懲勸之幽旨也若乃涉迷津於曩識微塵之數易窮返
覺路於初心僧祇之期難滿此迷悟之異也自有無間
獄中等芥城而限命先行天上儔衣石以受形此善惡
之殊也至若娑婆世界謂俄頃為百齡袈裟剝土將永
劫以浹日斯染淨之別也統而言之不過大小大小之
內各有三焉大則水火風而為災小則刀鎗疫以成害
是知六年華觀終焚蕩於沉灰千梵瓊臺卒漂淪於驟
雨加復診候無徵雩祈失効霜戈接刃星劍交鋒酷毒

生人崩亡殆盡恐三界而未悟嗟六道而悲夫

疫癘

依智度論曰何名為劫答曰依西梵正音名為劫簸颺陀

劫簸者

亦名劫波秦言分別時節

颺陀者

秦言善有二名為賢以多賢人出世故名賢劫也

又

立世阿毗曇論云佛世尊說一小劫者名為一劫二十小劫亦名一劫四十小劫者亦名一劫六十小劫亦名一劫八十小劫名一大劫云何一小劫名為一劫是時提婆達多比丘住地獄中受熟業報佛說住壽一劫云何二十

小劫亦名一劫如梵衆天二十小劫是其壽量佛說住壽一劫云何四十小劫亦名一劫如梵輔天壽量四十小劫佛說住壽一劫云何六十小劫亦名一劫如大梵天壽量六十小劫佛說住壽一劫云何八十小劫名一大劫佛說劫中世界經云二十小劫壞次經二十小劫壞已空次經二十小劫起成次經二十小劫起成已住是二十小劫起成已住者幾多已過幾多未過八小劫已過十一小劫未來第九劫現在未盡此第九一劫幾多已過幾多未來定餘九百六十年在

未已卯年翻此經為斷矣是二十小劫中間有三小災次第輪轉一

疾疫災二刀兵災二饑饉災

此三小災諸經論列名前後不同若依長阿含中起

世等初列刀兵次列饑饉後列疫病後列饑饉若依俱舍此曇婆沙論等初列刀兵次列疫病後列饑饉若依瑜伽對法

論等初列饑饉後列刀兵若據年月長短次第依瑜伽對法論者是也今且依立世阿毗

曇論之此即第九中即當第三災此劫由饑饉故盡佛

言是二十小劫世界起成得住中第一劫小災起時有

大疾疫種種諸病一切皆起閻浮提中一切國土所有

人民等遭大疾疫一切鬼神起瞋惡心損害世人壽命

短促唯住十歲身形矮小或二搥手或三搥手於其自
量則八搥手所可資食稊稊為上人髮衣服以為第一
唯有刀仗以自莊嚴是時諸人不行正法非法貪著邪
見等業日夜生長諸惡鬼神處處損人是時大國王種
悉皆崩亡所有國土次第空廢唯有小郡縣是其所餘
相去遼遠各在一處如是人者疾病困苦無人布施湯
藥飲食以是因緣壽命未應盡橫死無數一日一夜無
數衆生疾病疫死由行惡法得是果報於此中生劫濁

而起捨命已後墮三惡道時一郡縣次復荒蕪唯少家在相去轉遠各在一處疾疫死者無人送埋是時土地白骨所覆乃至居家次第空盡是時劫末唯七日在於七月中無量衆生遭疫死盡設有在者各散別處時有一人合集閭浮提內男女唯餘一萬留為當來人種唯此萬人能持善行諸善鬼神欲令人種不斷絕故擁護是人以好滋味令入毛孔以業力故人種不斷過七日後是大疫病一時息滅一切惡鬼皆悉捨去隨諸衆生

飲食衣服應念所須天即雨下陰陽調和美味出生身
形可愛安樂無病譬如親愛久不相見忽得聚集生喜
樂心共相携持不相捨離是前劫人壽命十歲後劫人
民從其而生壽命最長二十千歲如此功德自然得成
與善法相應身口意善捨壽命後生善道中從天捨命
還生人道自然賢善戒品具足捨壽已後更生天道久
久如是初劫中間疫病窮盡次第二劫來續二十千歲
是劫中間第一壽量是人從前二十千歲人所生神力

自在資生具足壽命四十千歲人天道生久久如是說
名第二劫中間第二壽量四十千歲資生具足壽命六
十千歲久久如是說名第三劫中間第三壽量六十千
歲從六十千歲至八十千歲是時女年五百歲爾乃行
嫁是時諸人唯有七病謂大小便利寒熱淫慾饑老等
如是時中一切國土富貴豐樂無有怨賊反逆盜竊村
落次比鷄鳴相聞耕種雖少收實巨多衣服財寶稱意
具足安坐受樂無所馳求壽命八十千歲時住阿僧祇

年乃至衆生未起十惡從起十惡因此百年則減十歲
次復百年復減十歲次第漸減至餘十歲最後十歲住
不復減長極八萬短至十年若佛不出世次第如此若
佛出世如正法住衆生壽命暫住不減隨正法稍減壽
命漸減

刀兵

依立世阿毗曇論云佛說一小劫者名爲一劫如是同
前乃至八十小劫名大劫中至二十小劫起成住中第

二小災起由大刀兵人壽十歲時三毒邪見日夜生長
父母兒子兄弟眷屬互相鬭諍何況他人是時諸人起
鬭諍已仍相手舞或以瓦石刀仗互相怖畏四方諸國
互相伐討一日一夜害死無量如是過失自然而生人
行不善得是果報於此中生劫濁而起是時人家一時
沒盡縱有餘殘各各分散是時劫末餘七日在於七日
中手執草木即成刀仗由此器仗互相殘害怖畏困死
是時諸人怖懼刀仗逃竄林藪或渡江水隱蔽孤洲或

入坑窟以避災難或時相見仍各驚走恐怖失心或時撲地譬如麋鹿遭逢獵師如是七日刀兵橫死其數無量設有在者各散別處時有一人合集閭閻浮提男女唯餘一萬留為當來人種於是時中皆行非法唯此萬人能行善法諸善鬼神欲令人種不斷絕故擁護是人以好滋味令入毛孔以業力故於劫中間留人種子自然不斷過七日後是大刀兵一時息滅一切惡鬼皆悉捨去隨時衆生所須衣食應念所須天即雨下陰陽調和

美味出生身形可愛相好還復一切善法自然而起清涼寂靜安樂無病慈悲心起無惱害意互得相見生喜樂心譬如親愛久不相見忽得聚集生喜樂心共相攜持不相捨離從其十歲展轉行善生人天中至二十千歲乃至壽命八十千歲住阿僧祇年

自別同前
不煩重述

饑饉

依立世阿毗曇論云從一小劫乃至八十小劫住劫中第三劫小災起時由大饑饉災欲起時由天亢旱一切

人民遭大疾疫一切鬼神起瞋惡心損害世人壽命短促唯住十歲身形短小或二三搦手所食稊稗人髮為衣猶為上服刀仗自嚴不相恭敬貧窮困苦愚癡邪見日夜生長穀貴饑饉舍羅柯行見他資糧便往奪食以此因緣餓死無數一切衆生生劫濁中自然而起造作惡業天不降雨四五年中由大旱故覓生草菜尚不可得何況米穀一切禽獸悉取食之於一日一夜饑餓死者其數無量郡縣空盡唯少家在相去轉遠不行正法

三毒轉盛貧窮困苦日夜相應是時六七年間天不降雨由大旱故思欲見水尚不可得何況飲食是劫中間唯七日在一日一夜餓死無數縱有在者各散別處時有一人合數閻浮提內男女大小共一萬人留為當來人種人能行善諸善鬼神欲令人種不斷絕故擁護是人以好滋味令入毛孔以業力故人種不斷過七日後是饑饉一時息滅一切惡鬼皆悉捨去所須衣食天即雨下陰陽調和美味出生身形可愛相好還復一切善

法自然而起清涼寂靜安樂無病慈悲入心無惱害意
譬如親愛久不相見忽得聚集生喜樂心共相攜持不
相捨離從於十歲展轉行善生人天中壽命長遠至二
十千歲乃至八十千歲自外法因並同初述

依立世論
中三災各

經七日若依餘經論說饑饉七年七月
七日疫病七月七日刀兵極經七日

故瑜伽論云謂

人壽三十歲時方始建立當爾之時精妙飲食不可復
得唯煎煑朽骨共為譙會若遇得一粒稻麥粟稗等子
重若末尼珠藏置箱篋而守護之彼諸有情多無氣勢

踴僵在地不復能起由饑儉故有情之類亡沒殆盡如此儉災經七年七月七日七夜方乃得過彼諸有情復共聚集起下厭離由此因緣壽不退減儉災遂息又若人壽二十歲時本起厭患今乃退捨爾時多有疫氣瘴癘災橫熱惱相續而生彼諸有情遇此諸病多悉損沒如是病災七月七日七夜方乃得過彼諸有情復共聚集起中厭離由此因緣壽量無減病災乃息又人壽十歲時本起厭患今還退捨爾時有情展轉相見各起猛

利殺害之心由此因緣隨執草木及以瓦石皆成最極
銳利刀劍更相殘害死喪終盡如是刀災極經七日方
乃得過

相生

依中阿含經云過去有輪王出世名曰頂生奉持法齋
修行布施國中貧者出財用給後經多時然國中有貧
窮者不能出物用給恤乏人轉窮困因窮便盜他物其
主捕伺收縛送詣刹利頂生王所白曰天王此人盜我

物願天王治王問彼人曰汝實盜耶彼曰實盜所以者何以貧困故若不盜者便無自濟王即出財而給與之語盜者曰汝等還去後莫復作由斯之故人作是念我等亦應盜取他物於是各競行盜是謂因貧無物不能給恤故人轉窮困因盜滋甚故彼人壽轉減形色轉惡父壽八萬歲子壽四萬歲彼人壽四萬歲時有人復盜送王王聞已便作是念若我國中有盜他物更出財物盡給與者如是竭藏盜遂滋甚我今寧可作極利刀若

我國中有偷盜者便收捕取坐高標下斬截其頭作此
念已便勅行之於後彼人効此利刀持行劫物捉彼物
主截斷其頭因貧盜甚刀殺轉增故彼人壽轉減形色
轉惡父壽四萬歲子壽二萬歲人壽二萬歲時時彼盜
者便作是念王若知實或縛鞭我或擯罰錢或貫標上
我寧妄言欺誑王耶念已白王我不偷盜是為因貧無
物不能給恤盜殺轉增便妄言兩舌故彼人壽轉減形
色轉惡父壽二萬歲子壽一萬歲人壽一萬歲時人便

嫉妬邪淫轉增故彼人壽轉減形色轉惡父壽一萬歲
子壽五千歲人壽五千歲時三法轉增非法欲惡貪邪
法故父壽五千歲子壽二千五百歲人壽二千五百歲
時復三法轉增兩舌麤言綺語故彼壽轉減形色轉惡
故父壽二千五百歲子壽千歲人壽千歲時一法轉增
邪見是也因一法增故彼人壽轉減形色轉惡父壽千
歲子壽五百歲人壽五百歲時彼人不孝父母不能尊
敬沙門梵志不行順事不作福業不見後世罪故父壽

五百歲子壽二百五十歲或二百歲今若長壽或壽百歲或不啻者佛復告比丘曰未來久時人壽十歲女生五月即便出嫁人壽十歲時有穀名稗子為第一美食如今粃糧以為上饌所有酥油鹽蜜甘蔗一切盡沒唯行十惡業道者為人所敬都未有善母於其子極有害心子亦於母極有害心父子兄弟姊妹親屬展轉相向有賊害心猶如獵師見彼鹿已極有害心人壽十歲時有七日刀兵劫甚彼若捉草即化為刀若捉蘆木亦化

成刀以此刀兵各各相殺彼於七日刀兵劫過七日便止爾時亦有人生慙耻羞愧厭惡不愛彼人七日刀兵起時便入山野在隱處藏過七日已則從山野於隱處出更互相見生慈愍心極相愛念猶如慈母唯有一子與久離別遠來相見情極愛念便作是語諸賢我今相見令得安隱我等由昔生不善心令親族死盡我等寧可共行善法離斷殺業行善法已壽便轉增形色轉好壽十歲人生子壽二十壽二十人復作是念若求善者

壽色轉好我等應可更增行善共離不與取行是善已
壽便轉增人生子壽四十歲復離邪淫行是善已壽色
轉好人生子壽八十歲復離妄言行是善已壽色轉好
人生子壽百六十歲壽百六十已復離兩舌行是善已
壽色轉好人生子壽三百二十歲復離麤言行是善已
壽色轉好人生子壽六百四十歲復離綺語行是善已
壽色轉好人生子壽二千五百歲復離貪嫉行是善已
壽色轉好人生子壽五千歲復離瞋恚行是已善壽色

轉好人生子壽一萬歲復離邪見行是善已壽色轉好
人生子壽二萬歲復離非法欲惡貪行邪法我等寧可
離此三惡不善法行是善已壽色轉好人生子壽四萬
歲壽四萬歲時孝順父母尊重恭敬沙門梵志奉行順
事修習福業見後世罪行是善已人生子壽八萬歲人
壽八萬歲時此閻浮洲極大豐樂多有人民村邑相近
如鷄一飛女年五百歲乃當出嫁唯有七病寒熱大小
便利淫慾饑食老等更無餘患時有王名螺為轉輪王

聰明智慧有四種軍整御四天下七寶千子具足端正
勇猛無畏能伏他衆統領大地乃至大海不以刀杖以
法教令令得安樂

餘有疾病饑饉作法
延促並皆同前

對除

依新婆沙論云然有聖言說彼對治謂若有能一日一
夜持不殺戒於未來生決定不逢刀兵災起若能以一
訶梨怛雞果起殷淨心奉施僧衆於當來世決定不逢
疫病災起若能以一團食施諸有情於未來世決定不

逢饑饉災時問如是三災餘洲有不答無根本災而有
相以謂瞋增盛身力羸劣數加饑渴此說二洲北拘盧
洲亦無罪業而生彼故又彼無有瞋增盛故

述曰衆生固執無思悛革慳貪嫉妬惡業逾盛所以人
情嶮惡凶毒汙流今入末法人物俱惡所有依正兩報
致令日夜衰耗故付法藏經云阿恕迦王自為僧行食
時賓頭盧用酥澆飯阿恕迦王白言大聖酥性難消能
不為疾尊者答曰不為患也何以故佛在時水與今酥

等是故食之終不成病爾時尊者欲驗斯事使手至地
下至四萬二千餘里即取地肥而示於王王今當知衆
生薄福肥膩之味皆流入地是故世間福轉衰減王供
養已歡喜而退良由世尊韜光未盈百年尚有斯徵况
今向有二千豈有精味故瑜伽論云三災起時爾時有
情復有三種最極衰損壽量衰損依止衰損資具衰損
壽量衰損者所謂壽量極至十歲依止衰損者謂其身
量極至一搯手或復一握資具衰損者爾時有情唯以

粟稗為食中第一以髮為衣中第一以鐵為莊嚴中第一五種上味悉皆隱沒所謂酥蜜油鹽等味及甘蔗變味

大三災部

時量

依新婆沙論云劫有三種一中間劫二成壞劫三大劫中間復有三種一減劫二增劫三增減劫減者從人壽無量歲減至十歲增者從人壽十歲增至八萬歲增減

者從人壽十歲增至八萬歲復從八萬歲減至十歲此
中一減一增十八增減合二十中劫世間成二十中劫
成已住此合名成劫經二十中劫世間壞二十中劫壞
已空此合名壞劫總八十中劫合名大劫成已住中二
十中劫初一為減後一唯增中間十八亦增亦減故對
法論云由此劫數顯色無色界諸天壽量也

時節

依契法師西國傳云陰陽曆運日月旋璣稱謂雖殊時

候無異隨其星建以標月名時極短者謂之刹那也如
新婆沙論云彼刹那量云何可知有作是言依施設論
說如中年女緝績毳時抖揀細毛不長不短齊此說為
怛刹那量彼不欲說毛縷短長但說毳毛從指開出隨
所出量是怛刹那問前問刹那何緣乃引施設論說怛
刹那量答此中舉麤以顯於細以細難知不可顯故謂
百二十刹那成一怛刹那六十怛刹那成一臘縛此有
七千二百刹那三十臘縛成一牟呼栗多此有二百一

十六千刹那三十牟呼栗多成一晝夜此有少二十不滿六十五百千刹那此五蘊一晝一夜經於爾所生滅無常有說此麤非刹那量如我義者如壯士彈指頃經六十四刹那有說不然如我義者如二壯夫掣斷衆多迦尸細縷隨爾所縷斷經爾所刹那有說不然如我義者如二壯夫執挽衆多迦尸細縷有一壯夫以至那國百練剛刀捷疾而斷隨爾所縷斷經爾所刹那有說猶麤非刹那量實刹那量世尊不說如世尊說譬如四善

射夫各執弓箭相背攢立欲射四方有一捷夫來語之
曰汝等今可一時放箭我能遍接俱令不墮於意云何
此捷疾不必芻白佛甚疾世尊佛言彼人不及地行藥
叉地行捷疾不及空行藥叉空行捷疾不及四大王衆
天彼天捷疾不及日月二輪二輪捷疾不及堅行天子
此薄日月輪車者此等諸天展轉捷疾壽行生滅捷疾
於彼剎那流轉無有暫停由此故知世尊不說實剎那
量問何故世尊不為他說實剎那量答無有有情堪能

知故又依安般經云於一彈指頃心有九百六十轉又
仁王經云一念有九十剎那一剎那中復有九百生
滅又菩薩處胎經云一彈指頃有三十二億萬千念念
念成形形形皆有識佛之威神入微識中皆令得度又
毗曇論合有十二重一名剎那二怛剎那三名羅婆四
名摩睺羅五名日夜六名半月七名一月八名時九名
行十名年十一名雙十二名劫一剎那者翻為一念百
二十剎那為一怛剎翻為一瞬六十怛剎那為一息一

息為一羅婆三十羅婆為一摩睺羅翻為一須臾三十
摩睺羅為一日夜一日夜計有六百三十八萬剎那僧
祇律云二十念為一瞬二十瞬名一彈指二十彈指名
一羅預二十羅預名一須臾一日一夜有三十須臾日
極長時晝有十八夜有十二極短時晝有十二夜有十
八春秋分便等又智度論云晝夜六分有三十時春秋
分時晝夜各十五時餘時增減五月晝時有十八夜有
十二十一月夜時有十八晝有十二依契法師西國傳

云居俗日夜分為八時

晝四夜四於二時各有四分

月盈至滿謂之

白分月虧至晦謂之黑分或十四日十五日月有大小故也白前黑後合為一月六月合為一行日遊在內北行也日遊在外南行也總此二行合為一歲又分一歲以為六時正月十五日至三月十五日漸熱也三月十六日至五月十五日盛熱也五月十六日至七月十五日雨時也七月十六日至九月十五日茂時也九月十六日至十一月十五日漸寒也十一月十六日至正月

十五日盛寒也如來聖教歲為三時正月十六日至五月十五日熱時也五月十六日至九月十五日雨時也九月十六日至正月十五日寒時也或為四時春夏秋冬也依論計之十五夜為半月兩半月為一月三月為一時兩時為一行一行即半年六月也兩行為一年二年半為一雙此由閏故以閏月兼本月此謂月雙非閏雙也若以五年兩閏為閏雙者二年半有一閏豈立隻乎積此時數明劫有四種一別劫二成劫三壞劫四大

劫從人壽十歲漸至八萬歲經多時八萬歲又減至十歲為一別劫對餘總故名為別也若以事格量依雜阿舍經云由旬城高下亦爾滿中芥子百年取一芥盡劫猶不盡按此即為別劫也若據大劫即以八十由旬城為量也樓炭經云以二事論劫一云有一大城東西千里南北四千里滿中芥子百歲諸天來下取一芥子盡劫猶未盡二云有一大石方四十里百歲諸天來下取羅穀衣拂石盡劫猶未窮此亦應是別劫也第二有成

劫四十壞劫亦爾所以然者世間成時二十別劫住時
二十別劫壞時二十別劫空時二十別劫此中以住合
成以空合壞故合四十別劫總此成壞合有八十別劫
為一大劫若更舒之別有六劫一別二成三住四壞五
空六大若更束之則有三劫一小劫二中劫三大劫小
則別劫中則成壞隨一大則總成與壞欲界中壽一劫
是小劫初禪三天壽劫是中劫二禪已去壽劫是大劫
外國俗算有六十位過此已後不可數故名阿僧祇此

數年為劫數一至六十位名阿僧祇劫此是大劫量也
故智度論經云以百由旬城為量百年取一芥故喻以
迦尸羅天衣百年一拂百由旬石為量者此並格量大
劫也即按索訶世界舊云娑婆世界一大劫中千佛出世尋夫
劫波之號不可以時數之故以假石芥城等准為一期
之候即約前中具含成住壞空四劫也如前從十歲增
至八萬復從八萬還至十歲經二十返一小劫二十小
劫為一成劫以年算之則經八千萬萬億百千八百萬

歲也止一為小劫矣今成劫已過入住劫來復經八小劫釋迦牟尼如來於住劫中當第四佛尚餘九百九十

六佛於後續次而出依契法師西國傳云夫數里之稱謂踰繕那

舊云由旬又曰踰闍那又曰由延皆訛畧

踰繕那者自古聖王

日運行也舊傳一踰繕那四十里矣印度國俗及三十里聖教所載唯十六里故毗曇論四肘為一弓五百弓為一拘盧舍八拘盧舍為一由旬一弓長八尺五百弓長四百丈四百丈為一拘盧舍一里有三百六十步一

步有六尺合有二百一十六丈為一里二里有四百三十二丈計前五百弓有四百丈為一拘盧舍猶欠三十二丈不滿二里計一拘盧舍減有二里計八拘盧舍減十六里為一由旬若依雜寶藏經一拘盧舍有五里計毗曇八拘盧舍為一由旬合有四十里

壞劫

依長阿含經云三災上際云何若火災起時至光音天為際若水災起時至遍淨天為際若風災起時至果實

天為際三災欲起時世間人皆行正法正見不倒修十
善行行此法時有人得第二禪者即踴身上昇於空中
住聖人道天道梵道高聲唱言諸賢當知無覺無觀第
二禪樂人聞此聲已即修無覺無觀身壞命終生光音
天是時地獄衆生罪畢命終來生人間復修無覺無觀
得生光音天畜生餓鬼阿須倫乃至六欲皆生光音天
爾時生地獄盡後畜生盡已次餓鬼阿須倫乃至他化
自在天盡已然後人盡無有遺餘此世敗壞乃成為災

又順正理論云乃至地獄無一有情爾時名為地獄已壞諸有地獄定受業者業力至他方獄中由此准知旁生鬼趣時人身內無有諸蟲與佛身同若時人趣此洲一人無師法然得初淨慮從靜慮起唱如是言離生喜樂甚樂甚靜餘人聞已皆入靜慮命終並得生梵世中乃至此洲有情都盡是名已壞瞻部洲人東西二洲例此應說北洲命盡生欲界天由彼鈍根無離欲故生欲界天已靜慮現前轉得勝依方能離欲乃至人趣無一

有情爾時名為人趣已壞若諸天趣欲界六天隨一法
然得初靜慮乃至並得生梵世中爾時名為欲天已壞
如是欲界無一有情名欲界中有情已壞若時梵世隨
一有情無師法然得二靜慮從彼定起唱如是言定生
喜樂甚樂甚靜餘天聞已皆入彼靜慮命終並得生極
光淨乃至梵世中有情都盡如是名已壞有情感世間唯
器世間空曠而住餘方世界一切有情感此三千世界
業盡於此漸有七日輪現諸海乾竭衆山洞然洲渚三

輪並從焚燎風吹猛焰燒上天宮乃至梵宮無遺灰燼
自地火焰燒自地宮非他地災能壞他地由相引起故
作是說下火風飄焚燒上地謂欲界火猛焰上昇為緣
引生色界火焰餘災亦爾如應當知如是始從地獄漸
減乃至器世界盡總名壞劫又觀佛三昧經云天地始
終謂之一劫劫盡壞時火災將起一切人民皆背正向
邪競行十惡天久不雨所種不生依水泉源乃至四大
駛河皆悉枯竭久久之後風入海底取日上天城郭於

須彌山邊置本道中

長阿舍經云其後久久有大黑風瀑起海水深八萬四千由旬吹使

兩披取日宮殿置於須彌山半去地四萬二千由旬安日道中乃至七日次第取之法用並然離心論云劫滅之時由乾陀山後有七日輪住從彼而出又說云分一日為七日又說云從阿鼻地獄下出日衆生業力故耳

一日出時百草樹木一時凋落二日出時四大海水從

百由旬乃至七百由旬內其水自然枯涸三日出時四

大海水千由旬乃至七千由旬內水展轉消盡四日出

時四大海水深千由旬五日出時四大海水縱廣七千

由旬乃至竭盡

長阿舍經云五日出已其後海水轉減猶如春雨後亦如牛跡中水遂至涸盡

不漬人
物也

六日出時此地厚六萬八千由旬皆悉煙出從
須彌山乃至三千大千剎土及八大地獄靡不燒滅烟
盡無餘人民命終皆依須彌山及六欲諸天皆悉命終
宮殿皆空一切無常不得久住七日出時大地須彌山
漸漸崩壞百千由旬永無遺餘山皆洞然諸寶爆裂煙
焰震動至於梵天一切惡道皆悉蕩盡罪終福至皆集
第十五天上十四天以下盡成灰墨新生天子未曾見
此普懷恐懼舊生天子各來慰勞勿生恐怖終不至此

人民命終生光音天以念為食光明自照神足飛行或
生他土若生地獄地獄罪畢亦生天上若罪未畢復移
他方無日月星宿亦無晝夜唯有大冥謂之火劫火災
果報致此壞敗劫欲成時火乃自滅更起大雲漸降大
雨滴如車軸是時此三千大千剎土水遍其中及至梵
天故瑜伽論云又諸有情能滅壞業增上力故及依六
種所燒事故復有六日輪漸次而現彼諸日輪望舊日
輪所有熱勢踰前四倍既成七已熱遂增七云何名為

六所燒事一小大溝坑由第二日輪之所枯竭二小河
大河由第三日輪之所枯竭三無熱大池由第四日輪
之所枯竭四大海由第五日輪及第六一分之所枯竭
五蘇迷盧山及以大地體堅實故由第六一分第七日
輪之所燒然即此火焰為風所鼓展轉熾盛極至梵世
如是世界皆悉燒已乃至灰墨及與餘影皆不可得從
此名為器世間已壞滿足二十中劫如是壞已復二十
中劫住云何水災謂過七火災已於第二靜慮中有俱

生水界起壞器世間猶水消鹽此之水界與器世間一時俱沒如是沒已復二十中劫住云何風災謂七水災過已復七火災從此無間於第三靜慮中有俱生風界起壞器世間如風乾支節復能消盡此之風界與器世間世間已壞又依順正理論云此水火風三大災起逼有情類令捨下地集上天中初火災興由七日現有說如是七日輪行猶如雁行分路旋運中間各相去五千踰繕那次水災興由降暴雨有作是說從三定邊空中

欬然雨熱灰水有餘復說從下水輪起湧沸水上騰漂
浸決定義者即此邊生後風災興由風相擊有作是說
從四定邊空中欬然飄擊風起有餘復說從下風輪起
擊風上騰飄鼓此決定義准前應知三災起時云何次
第要先無間起七火災其次定應一水災起此後無間
復七火災度七火災還有一水如是乃至滿七水災復
有七火災後風災起如是總有八七火災一七水災一
風災起水風災起皆次火災自水風災必火災起故災

次第理必應然何緣七火方一水災極光靜天壽勢力故
謂彼壽量極八大劫故至第八方一水災由此應知要
度七水八七火後乃一風災由遍淨天壽勢力故謂彼
壽量六十四劫故第八方一風災如諸有情修定漸勝
所感異熟身壽漸長由是所居亦漸久住故毗曇論偈
云

七火次第過 然後一水災 七七火七水
復七火後風

又對法論云如是東方無間無斷無量世界或有將壞
或有將成或有正壞或有已住或有正成或成已住如
於東方乃至一切十方亦爾如是若有情世間若器世
間業煩惱力所生故業煩惱增上所起故總名苦諦又
雜心論問何故壞劫不至第四禪答淨居天故彼無上
地生即彼般涅槃故亦不下生下地非數滅故若彼住
經壞劫者亦不然增上福力生彼處故內擾亂非故若
彼地內有擾亂者則外有災患彼初禪內有覺觀火擾

亂故外為火災燒第二禪內喜水擾亂故外為水災所
漂第三禪內有出入息風擾亂故外為風災所壞問第
四禪未曾有擾亂者何得不常答剎那無常所壞故第
四禪地不定相續隨彼天生宮殿俱起若天命終彼亦
俱沒耳

法苑珠林卷三

音釋

浹

即涉切十日幹

饑

具吝切饑饑也

驟

鋤祐切急也

診

章忍切驗視也

雱

羽俱

祭切祈雨

皸

補過切

颶

蒲撥切

矧

昨禾切短也

揅

陟革切

稗

蒲拜切似穀者

草

竄

七亂切逃也

藪

蘇后切

躋

都年切仆也

僵

居良切債也

銳

干芮切利也

粃

古行

稻

不粘切也

蕪

慈消切

悛

此緣切改也

韜

土刀切藏也

毳

充稅切細毛也

抖

抖當

口

揀所革切

燎

力弔切縱火也

燼

徐晉切火餘也

駛

疎吏切疾也

漬

疾智切浸

也

潤

爆

布校切火裂聲

欽定四庫全書

卷三

欽定四庫全書

法苑珠林卷四

唐 釋道世 撰

劫量篇第一之四

大三灾部之餘

成功

依起世經云爾時復經無量久遠不可計數日月時起
大重雲乃至遍覆梵天世界既遍覆已注大洪雨其滴

甚麤或如車軸或復如杵經歷百千萬年彼雨水聚漸
漸增長乃至天所住世界其水遍滿然彼水聚有四風
輪之所住持何等為四一名為住二名安住三名不墮
四名牢住彼雨斷已復還自退下無量百千萬億由旬
當於爾時四方一時有大風起其風名為阿那毗羅吹
彼水聚混亂不停水中自然生大沫聚大風吹沫擲置
空中從上造作梵天宮殿微妙可愛七寶間成謂金銀
瑠璃玻瓈赤珠磈礫碼碯有斯梵天世間出生彼大水

聚復更退下無量百千萬億由旬如前四方風起名阿
那毗羅由此大風吹擲水沫復成宮殿魔身天牆壁住
如梵身天無異唯有寶色精麤異耳如是次造他化自
在天展轉至夜摩天六天次第具足如梵天無異精麤
異耳時彼水聚轉復減少乃更退下無量百千億萬由
旬湛然停住彼水聚中四方浮沫水上厚六十八億由
旬周闊無量大風吹沫復造須彌山四寶所成復吹水
上浮沫為三十三天七寶所成又吹水沫於須彌山半腹

之間四萬二千由旬為日月天子宮殿皆七寶成以是因緣世間便有七日宮殿安住現在又吹水沫於海水上高萬由旬為空居夜叉造玻瓈宮殿城郭亦爾又吹水沫於須彌山四面各去山一千由旬大海之下作四面阿脩羅城七寶莊嚴又復大風吹水聚沫造作餘大寶山如是展轉吹水沫過四大洲八萬小洲須彌山王并餘一切大山之外周布安置名大輪圍山高廣正等六百八十萬億由旬牢固真實金剛所成難可破壞如

是大風吹搖大地漸漸深入乃於其中置大水聚湛然
停積以此因緣便有大海又起世經云此大海水何因
緣故如是鹹苦不堪飲食此有三因緣何等為三一者
從火災後經無量時起大重雲彌覆凝住後降雨滴注
滿世界彼大雨汁洗梵身天一切宮殿次洗魔天宮殿
次洗他化自在天化樂天兜率天夜摩天宮殿洗已洗
彼宮時所有鹹辛苦味悉皆流下次復洗須彌山及四
大洲八萬小洲諸餘大山等如是洗時浸漬流蕩其中

以是因緣令大海鹹不堪飲食第二此大海水大神大
身衆生在其中住所有屎尿流出海中以是因緣其水
鹹苦不堪飲食第三此大海水古昔諸仙曾所呪故願
海成其鹽味不堪飲食以是因緣令大海鹹不堪飲食
又依順正理論云所言成劫者謂從風起乃至地獄始
有情生謂此世間災所壞已二十中劫唯有虛空過此
長時次應復有等住世成劫便至一切有情業增上力
空中漸有微細風生是器世間將成前相風漸增盛成

立如前所說風輪水輪金輪等然初成立大梵天宮乃至夜摩天宮復起風輪等是謂成立外器世間由有情力謂光淨久集有情天衆既多居處迫迫諸福減者應散居下此器世間初一有情極光淨歿生大梵處空宮殿中後諸有情亦從彼歿有生梵輔有生梵衆有生他化自在天宮漸漸下生乃至人趣後生餓鬼旁生地獄法爾後成壞必最初若初一有情生無間獄二十中成劫應知己滿此後復有二十中劫名成已住次第而起

立世阿毗曇論云一切器世界起作已成時二種界起
長謂地火兩界風界起吹火界蒸鍊地界風界恒起吹
一切物使成堅實既堅實已一切諸寶種類皆得顯現
如是多時六十小劫究竟已度又長阿含經云此三及
地為四災四劫除地說三為大劫唯未至第四禪為淨
居天故無上地可生即於彼處涅槃亦不下生非數滅
故變成天地天地更始了無所有亦無日月地湧甘泉
味如酥蜜時光音諸天或有福盡來生或樂觀新地性

多輕躁以指嘗之如是三轉得其甜味食之不已漸生
麤肥失天妙色神足光明冥然大暗後大黑風吹彼海
水漂出日月置須彌邊安曰道中遠須彌山照四天下
時諸人輩見出則歡見入則懼自茲以後晝夜晦朔春
秋歲數終而復始劫初成時諸天來下為人皆悉化生
身光自在神足飛行無有男女尊卑衆共生世故名衆
生有自然地味味猶如醍醐亦如生酥味甜如蜜其後
衆生以手試嘗遂生味著漸成團食光明轉滅無復神

通食地味多者顏色麤悴其食少者顏色光澤遂生勝負因緣勝負故便生是非地味稍歇咸皆懊惱咄哉為禍無復地味又生地皮狀如薄餅地皮又滅又生地膚地膚滅故依增一經又生自然地肥味嘗如葡萄酒又樓炭經云地肥不生便生兩枝葡萄其味亦甘久久食多共相形笑兩枝葡萄不生更生抗米無有糠糲不加調和備衆美味衆生食之生男女形又增一經云時諸天子情意欲多者便成女人故有夫妻之名其後衆生

娼欲轉增遂夫妻共住其餘衆生壽福行盡後光音天
來生此間在母胎中因此世間有處胎生爾時造瞻婆
大城乃至一切城郭自然粃米朝刈暮熟暮刈朝熟刈
後隨生又依中阿含經米長四寸未有莖榦時有衆生
併取日糴如是相毀乃至併取五日粃米漸生糠糴刈
已不生遂有枯株爾時衆生懊惱悲泣各封田宅粃米
以為疆畔其衆自藏已米盜他田穀無能決者議立一
平等主善護人民賞善罰惡便有刀杖等物考楚殺戮

此是生老病死之原由有田地致此諍訟故各共減割以供給之故選一人形貌尊雅甚有才德請以為主於是始有民主之名田宅舍屋之名天下豐樂不可具述奉行十善哀念人民如父母愛子人民敬主如子敬父人壽大久豐樂無極又依順正理論云初受段食故身漸堅重光明隱沒黑暗便生日月衆星從茲出現由漸耽味地味便隱從茲復有地皮餅生競耽食之地餅復隱爾時復有林藤出現競耽食故林藤復隱有非種香

稻自生衆共取之以充所食此食麤故殘穢在身為欲
蠲除便生二道因斯遂有男女根生由二根殊形相亦
異宿習力故便相瞻視因此遂生非理乃至由有劫盜
過起僉量衆內一有德人各以所收六分之一顧令防
護封為田主因斯故立刹帝利名大衆欽承恩流率土
故復名大王未有多王自後諸王此王為首又長阿含
經云佛告比丘有四事長久無量無限不可以日月歲
數而稱計也云何為四一時世間災漸起壞此世時中

間長久不可以日月歲數而稱計也二者此世間壞已
中間空曠無有世間長久迥遠不可以日月歲數而稱
計也三者大地初起向欲成時中間長久不可以日月
歲數而稱計也四者天地成已久住不壞不可以日月
歲數而稱計也是為四事長久無量無限不可以日月
歲數而計量也頌曰

百旬芥易盡 三災理自傾 石火無恒焰
電光非久停 飢窘自相噉 刀兵競相征

疫病無醫効 空勞怨苦聲 親戚無相救

殘害有餘情 遺文虛滿筭 徒欣富貴盈

大息波川迅 悲斯苦業縈 生滅恒敦逼

煎迫未安寧

三界篇第二之一

四洲部

述意

夫三界定位六道區分麤妙異容苦樂殊跡觀其源始

不離色心檢其會歸莫非生滅生滅輪迴是曰無常色
心影幻斯謂苦本故涅槃喻云於大河法華方之於火
宅聖人啓悟息駕反源超出三有漸逾十地也尋世界
立體四大所成業和緣合與時而作數盈災起復歸
於滅所謂短壽者謂其長壽長者見其短矣夫虛空不
有故廬量無邊世界無窮故其狀不一於是大千為法
王所統小千為梵王所領須彌為帝釋所居鐵圍為藩
牆之城大海為八維之浸日月為四方之燭總總羣生

於茲是宅瑣瑣含識莫思塗炭沈俗而觀則迂誕之奢
言大道而察乃掌握之近事耳但世宗周孔雅伏經書
然辯括宇宙臆度不了易稱天玄蓋取幽深之名莊說
蒼天近在遠望之色於是野人信明謂旻青如碧儒士
據典謂乾黑如漆青黑誠異乖體是同儒野雖殊不知
是一然則俗尊天名而莫識實豈知六欲之嚴麗十梵
之光明哉嗟夫區界現事猶莫之知不思妙義固其已
矣竊惟方等大典多說深空尋長含樓炭辯章世界而

文博偈廣卒難檢究今簡要畧用標厥致耳

會名

長阿舍起世經等四洲地心即是須彌山山外別有八

山圍如須彌山下大海深八萬四千由旬其邊八山大

海初廣八千由旬中有八功德水

依順正理論云一甘二冷三軟四輕五清

淨六不臭七飲時不損喉八飲已不傷腹

如是漸小至第七山水廣一千

二百五十由旬其外鹹海廣於無際海外有山即是大

鐵圍山四周圍輪并一日月晝夜迴轉照四天下名為

一國土即以此為量數至滿千鐵圍遶訖名一小千復

至一千鐵圍遶訖名為中千世界即數中千復滿一千

鐵圍遶訖名為大千世界其中四洲山王日月乃至有

頂各有萬億

舊云百億者錯算也

成則同成壞則同壞皆是一化

佛所統之處名為三千大千世界號為娑婆世界梵本

正音名為索訶世界依自誓三昧經云沙訶世界者

漢言

忍界謂此土人物剛強難忍故立名號

其佛號曰能仁以別東廣名曰三

界一欲界二色界三無色界初欲界者欲有四種一是

情欲二是色欲三是食欲四是婬欲二色界有二一是
情欲二是色欲無色界有一情欲初具四欲強色微故
云欲界第二色界色強欲微故號色界第三無色界色
絕欲劣故名無色界

更依華嚴辯三千大千世界乃有多重不煩廣述也

地量

依嚴華經云三千大千世界以無量因緣乃成且如大
地依水輪水依風輪風依空輪空無所依然衆生業感
世界安住故智度論云三千大千世界皆依風輪為基

又新翻菩薩藏經云諸佛如來成就不思議智故而能
行知諸風雨相知世有大風名烏盧博迦乃至衆生諸
有覺受皆由此風所搖動故此風輪量高三拘盧舍於
此風上虛空之中復有風起名曰風雲輪此風輪量高
五拘盧舍於此風上虛空之中復有風起名瞻薄迦此
風輪量高十踰繕那於此風上虛空之中復有風起名
吠索縛迦此風輪量高三十踰繕那又此風上虛空之
中復有風起名曰去來此風輪量高四十踰繕那如是

舍利子次第輪上六萬八千拘胝風輪之相如來應正
等覺依止大慧悉能了知舍利子最上風輪名為周遍
上界水輪之所依止其水高量六十八百千踰繕那為
彼大地之所依止其地量高六十八千踰繕那舍利子
是地量表有一三千大千世界又樓炭經云此地深二
十億萬里下有金粟亦二十億萬里下有金剛亦二十
億萬里下有水際八十億萬里下有無極大風深五百
二十億萬里此雖六重前四是地輪第五是水輪第六

是風輪金光明經云此地深十八萬由旬下有金沙金沙正是金粟下有金剛地釋云前風輪堅固不可沮壞有大洛那力人以金剛杵擊之杵碎風輪無損大洛那力者是第四梵王那羅延力是佛身力亦名那羅延風輪風輪上次有水輪水輪者依立世經云深一百一十三萬由旬減風輪三十八萬由旬以衆生業力水不流散如食未消不墮熟藏又如倉貯米內外物持水輪亦爾外由有風持不散如世間鑽酪為酥此風力順轉此

水成金水深一百一十三萬由旬既順成金水但厚八十萬由旬所界三十三萬由旬皆屬金地金地輪中從少向多應厚十二洛沙一洛沙有十萬由旬此輪縱廣一等

山量

今據三千大千世界之中諸佛世尊皆垂化現現生現滅導聖導凡約一四天下即以一日月所照臨處以蘇迷盧山為中

唐云妙高山舊名須彌山又曰迷留亦云彌婁山此皆訛畧耳

高三百三

十六萬里四寶所成東面黃金南面瑠璃西面白銀北
面玻瓈在大海中亦深三百三十六萬里據金輪上如
起世經云須彌山下有八重山初山名佉提羅高四萬
二千由旬上闍亦爾七寶所成其須彌山佉提羅山二
山之間闊八萬四千由旬周匝無量佉提羅山外有山
名曰伊沙陀羅高二萬一千由旬上闍亦爾七寶所成
二山之間闊四萬二千由旬周匝無量伊沙陀羅山外
有山名曰遊乾陀羅高一萬二千由旬上闍亦爾七寶

所成二山之間闊二萬一千由旬周匝無量遊乾陀羅
山外有山名曰善見高六千由旬上闊亦爾七寶所成
二山相去一萬二千由旬周匝無量善見山外有山名
曰馬半頭高三千由旬上闊亦爾七寶所成二山之間
闊六千由旬周匝無量馬半頭山外有山名曰尼民陀
羅高一千二百由旬上闊亦爾七寶所成二山之間闊
二千四百由旬周匝無量尼民陀羅山外有山名毗那
耶迦高六百由旬上闊亦爾七寶所成二山之間闊一

千二百由旬周帀無量毗耶耶迦山外有山名斫迦羅

此言輪圓即
織圓山是也

高三百由旬上闊亦爾七寶所成二山之

間闊六百由旬周帀無量上列諸山中間皆是海水水

皆有優鉢羅華鉢頭摩華拘牟陀華奔荼利迦華等諸

妙香物遍覆於水去斫迦羅山其間不遠亦有空地青

草遍布即是大海於大海北有大樹王名曰閼浮樹身

周圍有七十由旬根下入地二十一由旬高百由旬乃

至枝葉四面垂覆五十由旬長阿含經云其山空地中

有大海水名曰鬱禪那此水下轉輪聖王道廣十二由旬
狹道兩邊有七重牆七重欄楯七重羅網七重行樹
周匝交飾七寶所成閻浮提地輪王出時水自然去其
道平現去海不遠有山名鬱禪山去此山不遠有山名
金壁過此山已有山名雪山縱廣五百由旬深五百由
旬雪山中間有寶山高二十由旬雪山埒出高百由旬
其山頂上有阿耨達池縱廣五十由旬其水清冷澄徹
無穢七寶砌壘其池底金沙充滿華如車輪根如車轂

華根出汁色白如乳味甘如蜜池東有恒伽河從牛口
出從五百河入於東海池南有新頭河從師子口出從
五百河入于南海池西有博叉河從馬口出從五百河
入于西海池北有斯陀河從象口出從五百河入于北
海依奘法師西國傳其瞻部洲之中地者阿那婆答多
池也此云無熱舊曰阿耨達池訛也在香山之南大雪山之北周八百
里金銀瑠璃頗胝飾其岸馬金沙彌漫清波皎鏡大地
菩薩以願力故化為龍王於中潛宅出清泠水屬瞻部

洲是以池東面銀牛口流出殄伽河

舊曰恒河又曰恒伽訛也

繞池

一市入東南海池南面金象口流出信度河

舊曰平頭河者訛也

繞池一市入西南海池西面瑠璃馬口流出縛翳河

舊曰

必河者訛也

繞池一市入西北海池北面頗胝師子口流出

徙多河

舊說曰私陀河者訛也

繞池一市入東北海或曰潛流下

地出積石山即徙多河之流為中國之河源也時無輪

王應運瞻部洲地有四主焉南象主則暑溫宜象西寶

主乃臨海盈寶北馬主寒勁宜馬東人主和暢多人故

象主之國躁烈篤學特閑異術寶主之鄉無禮義重財
賄馬主之俗天資獷暴情忍殺戮人主之地風俗機變
仁義照明四主之俗東方為上其居室則東開其戶日
則東向以拜人主之地南面為尊方俗殊風斯其大槩
至于君臣上下之禮憲章文軌之儀人主之地無以加
也清心釋累之訓出離生死之數象主之國其理優矣
斯皆著之經誥間諸士俗博閑今古詳考見聞然則佛
興西方法流東國通譯音訛方言語謬音訛則義失語

謬則理乖故曰必也正名乎貴無乖謬矣又起世經云
阿耨達宮中有五柱堂阿耨達龍王恒於中止佛言何
故名為阿耨達其義云何此閻浮提所有龍王盡有三
患唯阿耨達龍無有三患云何為三一者所有諸龍皆
被熱風熱沙著身燒其皮肉及燒骨髓以為苦惱唯有
阿耨達龍無有此患二者所有龍宮惡風暴起吹其宮
內失寶飾衣龍身自現以為苦惱唯阿耨達龍王無如
此患三者所有龍王各在宮中相娛樂時金翅大鳥入

宮搏撮或始生方便欲取龍食龍怖懼常懷熱惱唯阿
耨達龍無如此患若金翅鳥王生念欲往即便命終故

名阿耨達阿耨耨者

秦言無惱

佛告比丘雪山右面有城名毗

金離其城北有七黑山黑山北有香山其山常有歌舞

唱妓音樂之聲山有二崛一名為盡二名善盡七寶所

成柔輒香潔猶如天衣妙音乾闥婆王從五百乾闥婆

在其中止又順正理論云四洲之中唯瞻部洲有金剛

座上窮地際下據金輪諸最後身菩提薩埵將登無上

正等菩提皆坐此座起金剛定以無餘依及餘處所有
堅力能持此坐又長阿含經云佛告比丘有四大天神
何等為四一者地神二者水神三者風神四者火神此
之四大各共有之故地神生惡見言地中無水火風時
我知此地神所念即往語言汝嘗生念言地中無水火
風耶答曰地中實無水火風也我時語言汝勿生此念
謂地中無水火風所以者何地中有水火風但地大多
故地大得名佛告比丘我為彼地神除其惡見示教利

喜得法眼淨水中有地火風火中有地水風風中有地水火但初大多故偏得名也

界量

依立世阿毗曇論云大鹹海外有山名曰鐵圍入水三百一十二由旬半出水亦然廣亦如是周迴三十六億一萬三百五十由旬從閻浮提南際取鐵圍山三億六萬六千六百六十三由旬從閻浮提中央取東弗于逮中央三億六萬六千六百由旬從閻浮提中央取西瞿耶尼中央

三億六萬六百萬由旬從閻浮提北際取北鬱單越北際
四億七萬七千五百由旬從鐵圍山水際極西鐵圍山
水際還度十二億二千八百二十五由旬鐵圍山水際
周迴三十六億八千四百七十五由旬從此須彌山頂
至彼須彌山頂邊十二億三千四百五十由旬從此須
彌山中央至彼須彌山中央十二億八萬三千四百五
十由旬從此須彌山根至彼須彌山根十二億三千十
五由旬如是義者佛世尊說

依長阿含經云閻浮提其地縱廣七千由旬西瞿耶

尼其地縱廣八千由旬東弗于逮其地縱廣九千由旬北鬱單越其地縱廣十千由旬也

方土

尋夫方土人別不同總有二種一凡二聖若約方言之
即有四種所謂四天下人若以住處言之四天下中合
有四千八處則有四千八種之人若直接間浮提一方
言之如樓炭經說大國總有三十六之大國人亦同之
若展別論則有二千五百小國人亦同之又一一國中
種類若干胡漢羌虜蠻夷楚越各隨方土色類不同未

可具述故樓炭經云此南浮提種類差別合有六千四百種人但總彰大數不別其名長阿含經云佛告比丘此四天下有八千天下圍繞其外復有大海水周而圍繞八千天下復有大金剛山繞大海水金剛山外復有第二大金剛山二山中間窈窈冥冥日月神天有大威力不能以光照及於彼八大地獄也第一北鬱單越者依長阿含經云須彌山北天下有鬱單越國其土正方縱廣一萬由旬人面亦方像彼地形有大樹王名菴婆

羅園七由旬高百由旬枝葉四布五十由旬多有諸山
浴池華果豐茂無數衆鳥和鳴地生輦草槃縈右旋色
如孔翠香如婆師輦若天衣其地柔輦以足蹈地地凹
四寸舉足還復地平如掌無有高下彼土四面有四阿
耨達池各縱廣百由旬以七寶砌出四大河廣十由旬
衆鳥和鳴彼土無有溝坑荆棘株杌亦無蚊虻毒蟲地
純衆寶陰陽調柔四氣和順百草常生無有冬夏其土
常有自然粃米不種自生無有糠粳如白華聚猶忉利

天食衆味具足其土常有自然釜鍤有摩尼珠名曰焰
光置於鍤下飯熟光滅不假樵火不勞人功其土有樹
名曰曲躬葉葉相次天雨不漏彼諸男女止宿其下復
有香樹高七十里華果繁茂其果熟時皮破自烈自然
香出或高六十里五十里小者五里其果熟時皮破自
然出種種衣或出種種嚴身之具或出種種器或出種
種食或戲河中有衆寶船彼方人民欲入中洗浴遊戲
時脫衣岸上乘船中流娛樂訖已度水過衣便著先出

先著後出後著不求本衣次至香樹樹為曲躬其人手
取樂器調絃並以妙聲和絃而行詣園娛樂其土中夜
阿耨達龍王數數時起清淨雲周遍世界而降甘雨如
構牛乳以八味水潤澤普洽於中夜後淨無有翳空中
清明海出涼風微吹人身舉體快樂其土豐熟人民熾
盛設須飲食以自然粃米著於釜中以焰光珠置於釜
下飯自然熟珠光自滅諸有來者自恣食之其主不起
飯終不盡若其主起飯則盡竭其飯鮮潔如白華聚其

味如天無有衆病氣力充足顏色和悅無有衰耗其土
人身顏貌同等不可分別其貌少壯如閭浮提二十許
人其人口齒平正潔白無間髮紺青色無有塵垢髮垂
八指齊眉而止不長不短若其土人起欲心時有熟視
女人而捨之去彼女隨逐往詣園林若彼女人是彼男
子父親母親骨肉中表不應行欲者樹不曲蔭各自散
去若非親者樹則曲蔭隨意娛樂一日二日或至七日
爾乃捨去

立世阿毗曇論云北洲人不索女不迎妻不
買不賣若男子欲娶女時諦瞻彼女若女欲

羨男時亦須諦視男子若不見視餘女報言是人看汝
即為夫妻男不見女看餘男報言是女看汝亦為夫妻
若自相見便即相隨其往別處若多欲者一生之中數
唯至五其中品者或四三亦有修行至死無欲彼人懷
妊有惡食者耳彼人懷妊七日八日便產隨生男女置於四衢

大交道頭捨之而去有諸行人經過其邊出指含味指
出甘乳充遍兒身過七日已見兒長成與彼人等男向

男衆女向女衆彼人命終不相哭泣莊嚴死屍置四衢

道捨之而去有鳥名憂慰禪伽接彼死屍置於他方

世依

論云其鳥啄屍將去又其土人大小便時地為開圻便
至山外而便瞰食也

利訖已地還自合其土人民無所繫戀亦無蓄積壽命
常定死盡生天彼人何故壽命常定其人前世修十善
行身壞命終生鬱單越壽命千歲不增不減是故彼人
壽命正等若有人能施沙門婆羅門及施貧窮乞兒疾
病困苦者給其衣食乘輦華鬘塗香牀榻房舍又造塔
廟燈燭供養其人命終生鬱單越壽命千歲不增不減
其土不受十惡舉動自然與十善合身壞命終生天善
處是故彼人得稱為勝於三天下其土最上故泰言最

上立世論云彼土人民悉皆白淨人所莊飾鬚髮翠黑
恒如剃周羅五日頭髮自然長橫七指無有增減順正
論云北俱盧洲形如方座四邊量等面各二千既說界
方面各二千已具其義邊有二中洲一矩婆洲二憍拉
洲此二洲皆有人住第二東弗于逮依長阿含經云須
彌山東有天下名弗于逮其土正圓縱廣九千由旬人
面像彼地形有大樹王名伽藍浮圖七由旬高百由旬
枝葉四布五十由旬造天地經云東方人物勝閻浮提

人彼土用綿綃共相市易依長阿含經云彼土人壽二

百歲少出多減

樓炭經云人壽三百歲也

飯食魚肉

立世論云自不殺生不令他殺

若有自死則食其肉以穀帛珠璣共相市易人有婚禮嫁娶

立世論云

東弗婆提人其多欲者一生之中其數至七其中品者或至五六亦有修行至死無欲東西二洲人唯無黑色餘同閭浮提身有種種色彼人頭髮莊飾剪前被後上下雨衣著下竟上衣繞身而已依順正論

云東勝身洲東狹西廣邊量等形如半月東三百五十

三邊各二千此東洲東邊廣南洲南際故東如半月其

洲邊有二中洲者一提訶洲二毗提訶洲此二洲皆有

人住第三俱耶尼者依長阿含經云須彌山西天下名
俱耶尼其土形如滿月縱廣八千由旬人面像彼地形
有樹王名曰斤提圍七由旬高百由旬枝葉四布五十

由旬

起世經云於彼樹下有一石牛高一
由旬以此因緣名瞿陀尼此云牛貨

入壽三百歲

以牛馬珠玉共相市易人物亦勝閻浮提立世論云彼
土人或自殺生或令他殺死則食肉同閻浮提人若眷
屬死送喪山中燒屍棄去或置水中或埋土裏或著空
地東西二洲大同閻浮提婚禮亦同其欲多者一生之

中數至十二其中品者數或至十亦有修行至死無欲
彼人莊飾並皆被髮上下著衣依順正理論云西牛貨
洲圓如滿月逕二千五百周圍七千半其洲邊有中洲
者一捨捃洲二喁怛羅漫里拏洲皆有人住第四閻浮
提者依長阿含經云須彌山南有天下名閻浮提其土
南狹北廣縱廣七千由旬人面像此地形有大樹王名
閻浮提圍七由旬高百由旬枝葉四布五十由旬起世經云
于此樹下有閻浮那檀金聚高二十由旬復有金翅鳥
以此勝金出此樹下故名閻浮那檀金

王樹名俱利跋婆羅園七由旬高百由旬枝葉四布五十由旬阿脩羅王有樹名曰善盡園七由旬高百由旬枝葉四布五十由旬忉利天有樹名曰晝度園七由旬高百由旬枝葉四布五十由旬閻浮提人人壽百歲中天者多初十無知二十少知猶未黠了三十欲意盛四十所行無端五十所習不忘六十慳著七十體性遲緩八十無榮飾九十疾病百歲諸根衰耗經於三百冬夏春三萬六千食中間或有不具者立世阿毗曇論云閻

浮提人衣服莊飾種種不同或有長髮分為兩髻或有剃落髮鬚或有頂留一髻餘髮皆除名周羅髮或有拔除髮鬚或有剪髮剪鬚或有編髮或有被髮或有剪前被後令圓或有裸形或著衣服覆上露下或露上覆下或上下俱覆或止障前後四洲人民所食多種不可具述婚禮市易現事可知然論云閩浮提人一生欲事無數無量不同餘三洲人少欲亦有修行至死無欲依順正理論云南瞻部洲有邊洲一名遮末羅洲二名筏羅

遮羅洲此二洲中皆有人住

身量

依立世經云閻浮提人命促至十歲時身形短小或長
二搥手三搥手於其自身則有八搥手毗曇論云閻浮

提人至百歲時身長三肘半或長四肘

長阿含經云長三肘或有不

者大位言之

弗婆提人長八肘瞿耶尼人長十六肘鬱單越

人長三十二肘

壽量

如毗曇說閻浮提人壽命不定有其三品上壽一百二十五歲中壽一百歲下壽六十歲其間中天者不可勝數且依劫減時說有此三品若據劫初壽命無量或至八萬四千依長阿含經閻浮提人人壽百二十歲中

天者多東弗于逮人人壽二百歲

樓炭經云人壽三百歲

西俱耶

尼人人壽三百歲北鬱單越人人壽千歲

餘三方人並有中天者唯

比洲人定壽千年也

衣量

依起世經云閻浮提人身長三肘半衣長七肘闊三肘
半瞿陀尼人弗婆提人身衣與閻浮提等量鬱單越人
身長七肘衣長十四肘上下七肘阿脩羅身長一由旬
衣長二由旬闊一由旬重半起利沙

隋言半兩餘經說
阿脩羅大小不定

如毗婆質多阿脩
羅四倍高須彌山


優劣

長阿含經云佛告比丘閻浮提人有三事勝拘耶尼人
何等為三一者勇猛強記能造業行二者勇猛強記勤

修梵行三者勇猛強記佛出其土拘耶尼人有三事勝
閻浮提人何等為三一者多牛二者多羊三者多珠玉
閻浮提有三事勝弗于逮何等為三一者勇猛強記能
造業行二者勇猛強記能修梵行三者勇猛強記佛出
其土弗于逮有三事勝閻浮提何等為三一者其土極
廣二者其土極大三者其土極妙閻浮提有三事勝鬱
單越何等為三一者勇猛強記能造業行二者勇猛強
記能修梵行三者勇猛強記佛出其土鬱單越復有三

事勝閻浮提何等為三一者無所繫屬二者無有我
三者壽定千歲閻浮提人亦以上三事勝餓鬼趣餓鬼
趣有三事勝閻浮提何等為三一者長壽二者身大三
者他作自受閻浮提人亦以上三事勝金翅鳥金翅鳥
復有三事勝閻浮提何等為三一者長壽二者身大三
者宮殿閻浮提人亦以上三事勝阿須倫阿須倫復有
三事勝閻浮提何等為三一者宮殿高廣二者宮殿莊
嚴三者宮殿清淨閻浮提人亦以上三事勝四天王天

四天王天復以三事勝閻浮提何等為三一者長壽二
者端正三者多樂閻浮提人亦以上三事勝忉利天焰
摩天兜率天化樂天他化自在天此諸天復有三事勝
閻浮提何等為三一者長壽二者端正三者多樂



法苑珠林卷四